

DEMANDA AURKEZTU DUTE IRUNGO ZEIN BILBOKO EPAITEGIETAN, ALARDEA DELA KAUSA

Liskarra piztu du Bidasoaldeko Emakumeek epaitegietara jotzeak

■ Astearteko egun handiaren atarian giroa nahasia da Irunen. Bidasoaldeko Emakumeek zenbait demanda egin dituzte epaitegietan, Alarde 'tradizionala' legez kanpokoa dela eta. Demanda horien aurka azaldu dira, besteak beste, alkatea eta Alarde ofizialeko jenerala.

Arantxa Iraola / Irun

«ERREKURTSO batzuek jarri ditugu», plazaratu zuten ostiralean Bidasoaldeko Emakumeek. Horietako bat Irungo auzitegian ipini dute. «Aurre-demanda antzeko bat da, unean uneko arazoa konpondu nahi duena». Izan ere, Bidasoaldeko Emakumeen arabera, asteartean arazo handiak sor daitezke Irunen, bi Alarde aterako baitira, bata ofiziala, gizon eta emakumez osatua —Bidasoaldeko Emakumeek hori defendatzen dute— eta bestea *tradizionala*, emakumeak kantine moduan soilik onartzen dituen. Ez dute begi onez ikusten, ordea, Alarde horri agintariek eskaini dioten begirune gehiegizkoa. «Adierazi nahi dugu atera nahi duten beste Alardea legez kanpokoa dela, ez digulako guri tokirik uzten». Agintariek, sobera babestu dutela diote, ordea. «Erabat legala balitz bezala hartu dute, eta gure aurretik tratatu dituzte. Gu eskubide baten alde ari gara, ordea, eta haien, kontra».

Bidasoaldeko Emakumeen arabera, beren desfileari traba egingo die beste Alardea defenditzen dutenek. Izan ere, Herrizaingo Sailak hartutako erabakiaren arabera, goizeko 07:00etan aterako dira haiek. Alarde ofiziala, berriz, 08:25ean aterako da. Oso tarte txikia da hori Bidasoaldeko Emakumeen arabera. «Izan ere, une batean bi Alardeek topo egingo dute. Herrizaingo Sailak berak egindako kalkuluen arabera, hori horrela izango da...». Eta horrek kezkatzen ditu. Horregatik erabaki dute epaitegietako bidea urratzea. «Ez dugu beste Alardekoekin sartzeko asmorik. Demanda hauek egin ditugu haiek gurekin sartu direlako, gure Alardea eragozten dutelako. Autodefentsa moduan egin ditugu».

Horregatik, ildo horretan, EAeko Auzitegi Nagusiaren aurrean ere demanda bat ipini dute Bidasoaldeko Emakumeek, onarritzeko eskubideen urratze bat gerta daitekeela iragarrit eta hori saihesteko eskatuz.

Demanda horiek Bidasoaldeko Emakumeek beren izenean jarri dituzte, Alardearen Junta osoak ez baitu aho batez onartu urrats hori egitea. Horretaz gain, bi idatzi igorri dizkiote Irungo alkate Alberto Bueni. Horietan, gogor kritikatu dute hark Herrizaingo Sailari eskaintitako laguntza, aipatu emakumeen arabera, alkateak Herrizaingo Sailari aukera gehiegi eman baitizkio beraien ibilbidea aldatu eta ordutegia moldatzeko.



Alarde tradizionala legez kanpokoa dela diote Bidasoaldeko Emakumeek.

JACOBA MANTEROLA

Demandak direla eta, kritikak airean

■ Irungo alkate Alberto Buenek prentsurrekoa eman zuen atzo demandak kritikatzeko. Irungo Udaleko alderdi politikoaren bozeramaileen junta bildu ostean agertu zen prentsaren aurrean. Bertan, alkateak azaldu zuenez, adostasun batera iritsi ziren PSE-EE, EAJ eta EAko kideak. Bidasoaldeko Emakumeek ipinitako demandak erretiratzeko eskatzen idatzitako testua, ez zuten guztiek onartu, ordea. Horregatik alkateak bere kabuz plazaratutako idatzia zela esan zuen, bere izenean soil-soilik kaleratua. Zera dio bertan emakumeen demandak ahotan hartuta: «Erabat

desegokia da egin dutena, eta herritarren gehiengoarentzako probokazio bat izan daiteke». Hala, demanda horiek erretiratzeko eskatu du idatzi horretan.

Ildo berean, demanda horiekin desadostasuna islatuz idatzia plazaratu zuen atzo Alarde ofizialeko jeneral Alberto Lizarragak. «Errekurtsu horiek, une hauetan, jada nahikoa nahasia den egoera gehiago korapilatzea baino ez dakarte».

Bidasoaldeko Emakumeen arabera, ordea, Alarde ofizialean parte hartzea doazen guztiak bat eginda daude —«guztiok elkartuta gaude eskubideen aldeko Alarde honetan»— eta Lizarraga jene-

ralaren adierazpen horiek liskarra piztu nahi duten taldeen lanaren ondorioa direla diote. Ildo berean, gogor kritikatu dute Buenek errekurtsuak erretiratzeko egindako eskaera: «Auzitegietara jotzea lejitimoa da, eta alkateak hori zalantzan jartzea oso larria da».

Atzo, halaber, prentsurrekoa eskaini zuten Betiko Alardearen Aldekoek. Gogor kritikatu zuten, besteak beste, Emakunde Alarde ofizialari eskaintzen dion babes eta Alarde horretako kideentzat hitz gogorrak izan zituzten. «Denbora gehiago daramate gure Alardea lehertarazten euren prestatzeko baino», X

NAGORE KOCH



Bi gazte hil dira Euskal Herriko errepideetan

■ Bata Murchantekoa zen eta bestea Berrizkoa

Erredakzioa / Donostia

EUSKAL HERRIKO errepideetan atzo izandako bi istripu-tan bi gazte hil ziren: bata Murchantekoa (Nafarroa) eta bestea Berrizkoa (Bizkaia) ziren.

Lehenengo istripua atzo goizaldeko hiruretan gertatu zen. BI-633 errepidean gertatu zen ezbeharra. SOS-Deiak zerbitzuak pertsona baten kotxe bat aipaturiko errepidean iraulita zegoela. Donostian matrikulatutako Peugeot 505 kotxea, zer dela-eta ez dakitela, errepidetik irten eta irauli egin zen.

Istripuaren ondorioz kotxea gidatzen zihoan 22 urteko A.A.A. gaztea hil zen. Berrizko gaztea bakarrik zihoan kotxean istripua gertatu zen unean.

Beste istripua hiru ordutegira gertatu zen, Fontellan (Nafarroa). Kasu horretan kamioi batek eta kotxe batek elkar jo zuten. 232 errepide nazionaleko 102. kilometroan gertatu zen istripua. Murchanteko Fernando Calahorra Martinez gaztea Bartzelonan matrikulatutako Opel Kadet kotxe bat gidatzen zihoan, eta honetan ere zer dela-eta ez dakitela, kamioiaren kontra jo zuen. Istripua gertatu eta berehala hil zen 20 urteko gazte nafarra. Kamioiko gidariak zauri arinak ditu.

Istripu ugari gertatu ziren atzo Euskal Herriko errepideetan. Muskizen (Bizkaia) goizaldean gertatutako beste istripu batean beste bi gazte larri zauritu ziren. Hamazortzi urteko V.G.L. eta 17ko J.A.C. gazteak Gurutzetako erietxera eraman behar izan zituzten egoera larrian. X

Gay eta Lesbianen Nazioarteko Eguna dela eta, kalera

Gaur, Euskal Herri osoko gay eta lesbianek egun handia dute. Atzo jada, egun horren atariko, hainbat ekimen egin zituzten. Hainbat ekitaldik kutsu erreibindikatiboa izan zuten. Argazkian Donostian egindako manifestazioaren irudi bat ikusi daiteke. Arratsaldeko 19:30etan atera zen Bulebarretik eta leloa hau zen: «Sexualitatea giza eskubidea da. Gay eta lesbianentzat eskubide zibilak». Ildo berean, gaur beste hainbat manifestazio egingo dira. Bilbokoa 12:30etan abiatuko da Zabalburu plazatik, Gasteizkoa ordu berean Andre Mari Zuriaren plazatik eta Iruñekoa 13:00etan, Gaztelu Plazatik.